

### III. IGANDEA URTEAN ZEHAR (C)

#### Otoitza

Jainko ahalguztidun betierekoa,  
zuzendu zeure gogora gure bizi-tza,  
fruitu on ugari eman dezagun  
zure Seme maitearen izenean.  
Zurekin eta Espiritu Santuarekin.

I. IRAKURGAIA: Ne 8, 2-4a. 5-6. 8-10

*Lebitarrek Legea irakurtzen zuten,  
irakurri ahala azalduz, uler zezaten.*

Nehemiasen liburutik

Egun haietan, zazpigarren hilaren lehenbiziko egunean, Esdras apaizak ekarri zuen Legearen liburua, gizon eta emakume eta ezaguera zuten guztien batzarraren aurrera. Eta ur atearen aurreko enparantzan, goizetik eguerdiraino irakurtzen ari zitzairen, gizon eta emakume eta ezaguera zuten guztiei; eta herri osoa erne zegokion Lege liburuari.

Esdras idazlaria, hartarako egina zeukan zurezko oholtza batean zegoen zutik. Esdrasek herri osoaren aurrean liburua zabaltu zuen, guztiek ikusten zutela, denak baino gorago bainzegoen bera, eta liburua zabaltzearekin batera, herri osoa zutitu zen. Gero Esdrasek Jaunaren, Jaungoiko haundiaren, goralpena esan zuen, eta herri osoak, eskuak jatorik, erantzun: «Amen, amen»; eta makurtu ziren, eta ahuspez Jaungoikoa gurtu zuten.

Lebitarrek Jaungoikoaren Legea argi eta garbi irakurtzen zuten, irakurri ahala azalduz, uler zezaten.

Nehemias agintari nagusiak, Esdras apaiz idazlariak, eta herriari erakusten zioten lebitarrek, honela esan zioten herri osoari: «Gaurko eguna, Jaunari, gure Jaungoikoari, eskainia dugu; utz negar-malkoak» (herri osoa, Legearen hitzak entzutean, negarrez bainzegoen).

Eta esan zieten ere: «Zoazte; jan haragi guria, eta edan ardo gozoa, eta bidali jatekoak, berentzat ezer prestatu ez dutenei; gaurko eguna Jaunari, gure Jaungoikoari, eskainia baitago. Ez atsekabetu, Jaunaren poza da eta zuen indarra».

ERANTZUN SALMOA: Sal 18, 8-9. 10. 15

R/. **Zure hitzak, Jauna, espiritu eta bizi dira.**

Jaunaren legea bikain, barrena birbizteko,  
Jaunak hotsegina sendo, ezikasiak eskolatzeko.  
Jaunaren arauak zuzen, bihotzaren asegarri,

Jaunaren aginduak garbi, begien argi. R/.

Jaunaren beldurra garbi, iraungarri betiko,  
Jaunaren erabakiak egi, guztiak orobat betiko.  
Nire ahoko hitz eta bihotzeko gogoetak  
atsegingarri izan bitez zure aurrean,  
Jauna, ene harkaitz eta salbatzailea. R/.

II. IRAKURGAIA: 1 Ko 12, 12-30

*Zuek Kristoren gorputz zarete,  
eta zuetako bakoitza gorputz horren atal.*

San Paulo Apostoluak Korintotarrei

Senideok: Gorputza bat izanik ere, atal asko dituen bezala, eta gorputzeko atal guztiak, asko izanik ere, gorputz bat diren bezala, berdin Kristo ere. Gu guztiok —judutar nahiz greziar, menpeko nahiz askatu— Espiritu berberarengan bataiatuak izan gara, gorputz bat bakarra izateko. Eta guztiok Espiritu bakarretik edan dugu.

Gorputza izan ere, ez da atal bakarra, asko baizik. [ Oinak esango balu: «Eskua ez naizenez gero, ez naiz gorputzarena», ez luke horregatik gorputzarena izatea utziko. Eta belarriak esango balu: «Begia ez naizenez gero, ez naiz gorputzarena», ez luke horregatik gorputzarena izatea utziko. Gorputz guztia begi balitz, nola entzun? Eta gorputz guztia belarri balitz, nola usaitu?

Horra, bada, Jaungoikoak, Berak nahi bezala ipini ditu atalak gorputzean. Guztiak atal bat-bera balira, non legoke gorputza? Atalak, ordea, asko dira; baina gorputza bat. Begiak ez diezaioke eskuari esan: «Ez dut zure beharrik». Ezta buruak ere oinei: «Ez dut zuen beharrik».

Gehiago oraindik, makalenak diruditen gorputz atalak dira beharrezkoenak; eta geure gorputzean zatarrenak uste ditugunak, itzal haundiagoz inguratzen ditugu; eta lotsagarrienak, begirune gehiagor erabiltzen, berez agurgarri direnek ez baitute horren beharrik. Eta Jaungoikoak gorputz atalak eratu zituen, apalenei begirune haundiagoa emanaz; horrela ez dago alderdikeriarik gorputzean; atal guztiak berdin arduratzen baitira bata besteaz. Atal batek min duenean, min dute beste atal guztiak harekin; eta atal bat goretsia denean, poz dute beste guztiak harekin.]

Zuek, beraz, Kristoren gorputz zarete, eta zuetako bakoitza gorputz horren atal. [Egia esan, Jaungoikoak Elizan apostolu jarri ditu batzuk lehenengo; bigarren profeta, hirugarren irakasle; ondoren mirariak, geroago sendakintzarako dohainak, elkar laguntzarakoak, aginterakoak, era ezberdinetako hizkuntzen dohainak, eta hauek adieraztekoak. Guztiak apostolu al dira?, guztiak profeta?, guztiak irakasle?, guztiak egiten al dituzte mirariak?, guztiak al daukate sendakintzarako dohaina?, guztiak mintzo al dira hizkuntzatan?, guztiak adierazten al dute?]

EBANJELIOA: Lk 1, 1-4; 4, 14-21

**Aleluia:** Ik. Lk 4, 18b-19a

R/. Aleluia.  
 V/. Behartsuei berri ona ematera bidali nau Jaunak,  
 gatibuei askatasuna hotsegitera. R/.

*Gaur bete da Liburu Santuko hitz hau.*

Jesu Kristoren Ebanjelioa San Lukasen liburutik

Teofilo agurgarri: Asko saiatu dira, gure artean gertatutakoen kondaira idazten, hasieratik beren begiz ikusi eta gero hitzaren zerbitzari izandakoek jakin erazi zigutenei jarraituz. Nik ere, hasieratik guzti hauek arreta haundiz aztertu ondoren, denak hari egokian zuri idaztea erabaki dut, hartu dituzun erakutsien egia ezagutu dezazun.

Aldi hartan, Jesus, Espirituaren indarrez, Galileara itzuli zen, eta Haren izena lurralde hartan guztian zabaldu zen. Hango sinagogetan erakusten zuen, eta guztiek goresten zuten.

Jesus Nazareta joan zen, Bera hazi zen herrira, eta larunbatetan ohitura zuen bezala, sinagogan sartu zen eta zutik jarri, irakurgaia egiteko. Isaias profetaren liburua eman zioten.

Liburua zabaldurik, profetaren hitz hauek aurkitu zituen:

«Jaunaren Espiritua niregan dago,

Berak gantzutu bainnau,

behartsuei berri ona emateko.

Gatibuei askatasuna

eta itsuei ikusmena hotsegitera bidali nau,

zapalduei askatasuna ematera,

Jaunaren grazi urtea hotsegitera».

Liburua bildu ondoren, laguntzaileari eman zion, eta eseri egin zen. Sinagogan ziren guztien begiak Hari begira-begira zeuden.

Bera honela hasi zitzaien hitzegiten: «Gaur bete da, orain entzun duzuen Liburu Santuko hitz hau».

### **Oparigaien gainekoa**

Begi onez begira, Jauna, gure eskaintzari:

gu santu egin gaitzala eta salba.

Jesu Kristo.

### **Jaunartze ondorengoa**

Jainko ahalguztiduna,

bizi berriaren grazia eman diguzu;

egizu, bizi berri honek beti poztu gaitzala.

Jesu Kristo.